


Kanal 10
Arben Ahmeti
Drejtor
Prishtinë



VENDIM

**Lidhur me Rastin Nr. 2021/28 - Komisioni i Pavarur i Mediave (KPM) për
Kanal 10 (Palë përgjegjëse)**

Faktet

1. Komisioni i Pavarur i Mediave (KPM) është përgjegjës për zbatimin e Kreut VIII të Ligjit për Zgjedhjet e Përgjithshme në Republikën e Kosovës Nr. 03/L-073, përmes të cilit përcaktohet sjellja e ofruesve të shërbimeve mediale audiovizuale gjatë fushatës zgjedhore. Duke u bazuar në kapitullin e VIII të këtij Ligji, KPM ka nxjerrë udhëzuesin për të ndihmuar të licencuarit që të veprojnë në pajtim me Ligjin për Zgjedhje.
2. KPM, me datën 26 janar 2021 i ka dërguar Palës përgjegjëse Udhëzuesin për zbatimin e Kreut VIII të Ligjit Nr. 03/L-073 për Zgjedhjet e Përgjithshme, me qëllim që t'i ofrohen udhëzime për respektimin e dispozitave ligjore gjatë mbulimit të fushatës dhe heshtjes zgjedhore gjatë Zgjedhjeve të Përgjithshme në Republikën e Kosovës.
3. KPM me datën 1 shkurt 2021 elektronikisht i ka njoftuar të gjithë të licencuarit e KPM-së se duke u bazuar në mandatin ligjor është duke i monitoruar mediat për pajtueshmërinë e tyre me Ligjin dhe aktet nënligjore të KPM-së, duke ua rikujtuar se është i ndaluar sponsorizimi dhe vendosja e produkteve në emisionet e lajmeve dhe programet për çështje aktuale me interes për publikun.
4. KPM, me qëllim të vlerësimit të pajtueshmërisë së Palës përgjegjëse me Udhëzuesin për zbatimin e Kreut VIII të Ligjit Nr. 03/L-073 për Zgjedhjet e Përgjithshme, ka bërë monitorimin e këtij ofruesi të shërbimeve mediale në datat 3 dhe 4 shkurt 2021 dhe në bazë të Raportit të monitorimit ka gjetur se Pala përgjegjëse ka vepruar në kundërshtim me Ligjin Nr.04/L-44 për Komisionin e Pavarur të Mediave dhe me Rregulloren KPM-2017/07 për Komunikimet Komerciale Audiovizuale, duke transmetuar komunikime komerciale në ekran të ndarë dhe në emisionet aktuale duke vendosur produkte dhe duke i sponsorizuar ato.

5. KPM me datën 5 shkurt 2021 i ka dërguar Njoftim për shkelje Palës përgjegjëse dhe e ka njoftuar për shkeljet e bëra, si dhe e ka udhëzuar që të veprojë në pajtueshmëri me Kreun e VIII të Ligjit Nr. 03/L-073 për Zgjedhjet e Përgjithshme.
6. KPM pas dërgimit të Njoftimit për shkelje ka bërë edhe një monitorim të Palës përgjegjëse për datën 6 shkurt 2021, për të vlerësuar ardhjen në pajtueshmëri me Ligjin dhe aktet nënligjore të KPM-së. Në bazë të Raportit të monitorimit të datës 8 shkurt 2021 është gjetur se Kanal 10 vazhdon të veprojë në kundërshtim me Ligjin Nr.04/L-44 për Komisionin e Pavarur të Mediave dhe me Rregulloren KPM-2017/07 për Komunikimet Komerciale Audiovizuale.

Analiza ligjore

7. Komisioni i Pavarur i Mediave, bazuar në faktet dhe analizat e lartpërmendura, konstaton se Pala përgjegjëse gjatë fushatës zgjedhore për Zgjedhjet e Përgjithshme në Republikën e Kosovës ka vepruar në kundërshtim me nenin 31 paragrafi 4, të Ligjit të KPM-së 04/L-44, nenin 12 paragrafi 1 dhe nenin 15 të Rregullores KPM-2017/07 për Komunikimet Komerciale Audiovizuale.
8. KPM konstaton se edhe pse Pala përgjegjëse është njoftuar me kohë për respektim të Ligjit Nr. 03/L-073 për zgjedhje, Ligjit dhe akteve nënligjore të KPM-së, i është dërguar Udhëzuesi me qëllim që t'ju ofrohen udhëzime për respektimin e dispozitave ligjore gjatë mbulimit të fushatës zgjedhore, sërish është gjetur në shkelje. Bazuar në Raport të monitorimit është gjetur se Pala përgjegjëse gjatë fushatës zgjedhore me datën 3 dhe 4 shkurt 2021 në emisionet “Prime Time” dhe “Politiko” ka pasur reklamim me ekran të ndarë, duke vepruar kështu në kundërshtim me nenin 12 paragrafi 1, të Rregullores KPM-2017/07 për Komunikimet Komerciale Audiovizuale, i cili përcakton se:

“Reklamimi me ekran të ndarë nuk duhet të jetë i tepërt në atë mënyrë që do t’ua pamundësonte shikuesve të vazhdojnë të shikojnë përmbajtjen editoriale dhe nuk duhet të përdoret në programet e fëmijëve, të fesë, të lajmeve dhe ato të çështjeve aktuale. Dispozitat e kësaj Rregulloreje në lidhje me orarin dhe kohëzgjatjen e reklamimit televiziv dhe teleshopingut do të zbatohen për reklamimin me ekran të ndarë.”

9. KPM, po ashtu ka konstatuar se emisioni “Politiko”, i cili trajton çështje aktuale politike, sociale, ekonomike dhe zhvillimet e fundit në vend, ku është debatuar me profesionistë dhe opinionistë politik për premtimet aktuale elektorale, është sponsorizuar, duke vepruar kështu në kundërshtim me nenin 31 paragrafi 4, të Ligjit të KPM-së 04/L-44, i cili përcakton se:

“Programet e lajmeve dhe ato të çështjeve aktuale nuk do të sponsorizohen.”

10. KPM ka konstatuar se Pala përgjegjëse në emisionet “Politiko” dhe “Prime Time” ka bërë edhe vendosje të produkteve, në tavolinën e moderatorit dhe të të ftuarve është vendosur gotë me shenjën e Petrol Company dhe shishe të ujit, duke vepruar kështu në

kundërshtim me nenin 15, të Rregullores KPM-2017/07 për Komunikimet Komerciale Audiovizuale, i cili përcakton se:

“Vendosja e produkteve do të ndalohej,”


11. KPM konstaton se Pala përgjegjëse nuk e ka marrë për bazë Njoftimin për shkelje të dërguar dhe nuk ka ndërmarrë asgjë për të ardhur në pajtueshmëri me Ligjin dhe aktet nënligjore të KPM-së, duke vazhduar t'i bëjë shkeljet e njëjta në emisionet “Prime Time” dhe “Politiko”. Gjatë këtyre emisioneve janë transmetuar reklama në ekran të ndarë, është bërë vendosje e produkteve në tavolinën e moderatorit dhe të të ftuarve dhe emisioni “Politiko” është sponsorizuar.
12. Komisioni, duke u bazuar në faktet e lartpërmendura, konstaton se Pala përgjegjëse ka bërë shkelje të nenit 31 paragrafi 4, të Ligjit të KPM-së 04/L-44, nenit 12 paragrafi 1 si dhe nenit 15 të Rregullores KPM-2017/07 për Komunikimet Komerciale Audiovizuale.

Vendim

13. Pala Përgjegjëse sanksionohet me gjobë në shumën prej pesë mijë (5,000.00) euro në pajtim me nenin 30, paragrafi 1.3, të Ligjit të KPM-së, për shkelje të nenit 31 paragrafi 4, të Ligjit të KPM-së 04/L-44, nenin 12 paragrafi 1 dhe nenin 15 të Rregullores KPM-2017/07 për Komunikimet Komerciale Audiovizuale.

E drejta për ankesë

14. Ankesat i parashtrihen Bordit për Ankesa brenda tridhjetë (30) ditësh nga pranimi i vendimit të KPM-së në pajtim me nenin 29, paragrafi 5, të Ligjit të KPM-së. Ankesa bëhet me shkrim dhe duhet të përcillet me dokumente ose dëshmi që mund të kërkohen nga Bordi i Ankesave në pajtim me nenin 42, paragrafi 2, të Ligjit të KPM-së.
15. Bordi për Ankesa do t'i merr parasysh vetëm ankesat e bazuara në informacione ligjërisht relevante të cilat nuk ishin të disponueshme në kohën e marrjes së vendimit të KPM-së, apo të bazuara në mundësi se ekzistonte gabim procedural dhe material i bërë nga ana e KPM-së gjatë marrjes së vendimit.


Xhevat LAFI
Kryetar



11.02.2021
Datë